

之門一各道州府郡縣內經明行修識達治體可為任使者暗練吏事兼識軍務可當鎮守者監司守令旁求選舉實封以聞以備擢用一京外官當薦望之際若舉貪污不法者曾犯罪名者不謹職事曾見貶黜者則本曹輒移文憲司痛行禁斷一守令殿最一年再考雖有定制然不稱其職者不可使一日臨民監司坐視其弊以待褒貶之期殊失黜陟之義自今如有不稱其職者不拘限期輒實封以聞隨即改差以副民望 乞之○
丁丑宗親義安大君和等獻壽○夜良方有赤氣○戊寅遣內官劉忱移李佇于利川宮主隨之命監司供億臺諫上䟽略曰李佇父子罪當就戮 殿下不忍致辟置佇于咸州已失於輕今又遣宦官將置利川與其父所在相距甚近恐生禍階願令移置畿外遠處 上召持平李孝仁正言李種華等教曰予之不殺李佇父子欲以保全也父子豈不欲相見也予之妹隨佇在遠方予豈安心故移置利川宜勿復言孝仁對曰雖欲移置不可近京 上曰汝等為此言不止則吾必使父子同處或特